

The Makuilongdi Express

Liangmai Daily Newspaper

"Mazibo niu ngamne"



Popular TV Star Vaishali Takkar hai ndaanai paki gasu nkhesat jiu bamniuwe chiujuu dinne. Pahai India gu Star Plus TV Show ga pajan tadkhai mibo "Yeh Rishta Kya Kehlata Hai" ga Sanjana thiujuu 2015 gasu 16 katang kiukhai mibowe.

Nagaland State ga lungbam mai aliu Liangmai dung di wangkinbo Chagaahiu zengtung 30&31 2022 ga Tening Town Ga Rekindling our culture chiubo ladpui hang gasu Chagaa Gadi & Lamsimngyi cum Mini Hornbill festival tadkiu raye chiujuu dinne.



Zengtung 18 Chagaahiu 2022 Machanai Chiang PO Tamei ,Tamenglong Dist. Manipur Vol.01. Issue 17. Page 1

Pawan thin mawi lulo, palamra pawan hai saye. Ephesamai 5:16.

ENPO niu MLAs 20 tu resign thiu miko chiujuu dinkhai mide.

Nagaland Post Kohima

Chag. 17: Tuhoi Nagaland State naimiak patlam bambo district dung hai paliu leng tamsinjuu state Frontier Nagaland pilo chiujuu khengjiu bam mine palamra development hai njan ncham makge chiujuu dinjuu paliu hai tuhoi bambo Nagaland gasu njanpadlo chiujuu tacham ga dinne. Tukhoi paliuniu tammira khengjiu bambo district dung haira, Kiphire, Longleng, Mon, Tuensang, Shamator khatdi Noklak haidung siye. Haibo district dungniu 8154 Sq. km kumbo cover thiujuu bambowe, Nagaland gu state paphan kumbowe chiujuu dinne. Naga gu tribe kadibo 6 haisidi haibo ga joubowe.

Ndasai Independence day changee lubo sai Eastern Nagaland People's Organisation (ENPO) niu paliu leng tamjiu statehood pimaksai paliura state gu nai centre gu election ga joulakde chiujuu chamsui lukhai mibowe chiujuu dinne. Nagaland legislative election mana wangsubo nai nchamjiu sibo district gasu kiujuu bambo MLAs 20 tu resign thiu mira state khatdi center lamgudi chiujuu dinkhai mide. Sigasu Hornbill Festival gadi jounakra chamsui lukhai mide chiujuu dinne. Paliu ronna tamjiu changee mira government khuga khengkhai jiu bam mide. Tribe chania, Chang Khulei Setshang, Khiamniungan Tribal Council, Konyak Union, Phom People's Council, United Sangtam Likhum Pumji, Tikhir Tribal Council kahtdi Yimkhiung Tribal Council dung niu di tuhoi tamra khengjiu bambo ENPO tu support thiujuu we chiujuutacham ga dinne.

MAHURD & PR Minister Yumnam Congress gu President Khemchand nai WRD, Relief & DM Minister Awangbow Tamei wanjeng ga PMGSY puidi phuitad khai mide.



Photo/ HEHS ariaknah niu minister tu judou khaibambo nai Kuilong pui phuitad bambo meng.

Chag. 17: Tadmibo Nidwannai khatdi Nidnai chiujuu Tamei ga manai khai lujiu chakhuang thiujuu bambo Munhu Awangbow Newmai, Minister Water Resources Development, Relief & Disaster Manangement, khatdi Munhu Yumnam Khemchand Minister M A H U R D , R D & P R , panainiu tuhoi aliu Tamei areas ga PMGSY hang gasu npui kapha taliujuu bambo dung phuitad khai mide.

Tanaa khang madai rih lungsui makge chiubo ladchapsi maning kaloun khai lanlo.IKAL

Chag. 17: Tadmibo Chagaahiu zengtung 13th nai Manipur State Cabinete niu tanaa khang madairi kalungbo kikhun leng government gu pajat kachabo pilak mide chiujuu senpad mibo ladchaphai maning kaloun khailanlo chiujuu Iramdam Kanba Apunba Lup (IKAL) niu government khuga khengkhai mide chiujuu tachamga dinne.

Tadmibo Nidnai IKAL gu office, Uripok Khaidem



Panai puitad ga araik nahmai khatdi nam- namgu jupou mainiu judou khaijuu chalui chalendi lenjuu karu khai mide. Tuhoi Tamei gasu Kuilong npui hai aliu Liangmai nam Makai sangu lifeline thiujuu bambo npuihai tuhoi katang taliuloi makjiu bambo tudi panainiu Kuilong nam katang tadkhai lujiu phuitang khai mide. Khemchand niu dinjuu haibo npuihai majadbo lungga taliu loi mira kamraye, taliu loi lusai npui..... cond. page 2

Leikai ga Secretary General Organisation,

W Luwangleima niu tacham lumai khuga dinjuu, government niu ladchap khaimibo chamsui hai Manipur ga lungbam niubo (Indigenous) donjengniu maning kaloun khailan khelo chiujuu kheng khai mide chiujuu dinne. Indigenous gu population hai khinkiujuu bambowe. Manipur ga population hai chamai lakh 30 kumbo bamme chiudi lakh 15-16 kumbo ningga ronna indigenous maiye chiujuu dinne.

AICC gu kuthubo bam President bamleng Ndanai Mennai vote khaikiu mide chiujuu dinne. Senior Congress leaders Mallikarjun Kharge khatdi Shashi Tharoor niu tanjuu atung bamme chiujuu dinne. Pradesh Congress Committee (PCC) chamai 9000 sanniu vote khaikiu raye chiujuu tachamga dinne. AICC gu headquarters ga khatdi tam-tambo state ga suniu Polling booths 65 ga khaikiu raye. Congress Party takum 137 tadwang miboga thaimien president kadaboniu paluan 6th bo lengnge chiujuu dinne. Takum makai san election khai tahjuu wangmibowe. 2000 kum Jitendra Prasada nai Sonia Gandhi contest kamjiu Sonia niu ngalubo sai paniu phungjut jiu wangmi bowe. Manipur State gadi haibo Congress gu president leng vote khaikiujuu bam mide. Polling Booth No. 33 Congress Bhawan, Imphal ga khaikiujuu bamme, Manipur gasu niudi voters 54 kumbo khaikiu sune chiujuu tachamga dinne. Vote khaikiu mibo hai Chagaahiu 19th nai pamadu misune chiujuu dinne.

Karingting Lunlung



@@@Aliu tam-tambo day wajiu observe thiubam, takum khatdi aliugu church maksai organisation gu leaders mai rangpat mak maakumra aliudi " IT road Smooth Day nai Eletric regularity Day" observe thiukhe chung????? # ## YOH H H H H H H H H H

Nanaatu piju palung masanmai pi thiukhaine sai, raiboga tasi ningting kati khai bilo.

Editorial

Liangmai makum khailo

Aliu Liangmai tuhai State sum, Assam, Manipur khatdi Nagaland chiujiu jantam khai mide sigasu Nagaland ga phuisai A/C niaga jankhaijiu aliuniu majority thiungam lakjiu bamme, sikumjiu Manipur ga phuisai A/C madaiga jankhai lanmide. Patun khat gadi aliu majority thiu kungjiu bamme. Aliura mainiu kadinbo hinang yoh nai suiye chiuba hangga saadi chiu kadunjiu bamra mah? Khe aliudi government khuga aliutu pabam khatga aruang khaira khengjiu tam-tambo demand piju kamkhe. Naga su solution wangbo tingga ndechiu khe chiubo sikumbo hinang aliu kaden sukhe. Aliu Liangmai tu pabam khatga khaisai MLA nia maksai sumra masan siakjiu Liangmai piu thiujui patbo suiye. Jupaomai chalung sajiu makum khaisai wilakmah?

Russia niu Ukraine ga suicide drone niu attack thiujui chamai kang 8 shai mide.



The Hindu, Kyiv

Chag. 17: Ndahnai Ukraine's gu capital khatdi naimik pat jailam bambo Sumy ga Iran niu taliubo suicide drones niu attack thiujui chamai kang 8 tu kamsat mide chiujiu dinne. Shaibo ruangga chahiu 6 pawan phungkibo pui nai pakinaa di jouwe chiujiu dinne. Drone kengjiu langkhaijiu attack kamjiu tuhoi chamai shaisou makjiu bambowe khatdi Ukraine gu capital Kyiv ga katang attack thiujui chamai wajiuniu ajamjiu bamme chiujiu tachamga dinne.



Office of the
STATE LEVEL CHAGA NGEER, MANIPUR 2022
(THE LIANGMAI BLESSED FESTIVAL)
Motto: "Preserve and Promote our Culture"

Chaga Chamlen.

Maning chakung thiubambo Liangmai kadi kati kaku kanah kating kanaa mai mathiu khuga chunwibo Chaga cham poukhai ye. Apoupe mainiu aliu Liangmai Tanya chakhuang cha-geer kengjiu manya bamniu we chiudi pakhiang nahsi manya kamlak mibo donniu mairam maira seed sowing/harvest/thanks giving kumbo changee tu thin madi ye chiudi Liangmai ra haibo Chaga Ngee dusi kam madi raijiu state level ga phungkheng khe chiujiu 2004 kum Chiang (Langmei) namga Liangmai rong gasu wasi pad rai bimai nai kating khangkiang mai wang madui lujiu seminar bamkhai lujiu state Level Chaga Ngee chiujiu Manipur Government niudi palun sikhai ra kheng jiu changee jut-jutjiu pachali-pachali thiujui changee wang mide. Aliu san wiji Liangmai piu thiujui Munhu Awangbow Newmai niudi Minister thiubam nangjiu paniudi Cabinete Meeting ga phungpad lanjiu 2021 kum state restricted holiday pikhai biji Tingwang tudi paliu katheng kadi maitu thuanjiu apoupe ram Makuilongdi charanam ga jengtung 30th Chagaahiu 2022 bonai state level gu thiujui pachakiubo(9) changee ra rang khaijiu, paniadi kakenglam luiwang mide. Siniu Liangmai hina apoupe pon Liangpon piu lujiu wang changee nchamjiu Chaga thoi leng lukhe chiujiu Luan 9th State Level Chaga Committee ladbam thiujui poupad khaiye.

Mathiu Ngamga
Luan 9th State Level Chaga Ngee Committee 2022



MAHURD & PR Minister Yumnam Khemchand nai WRD, Relief &....

condt. from p.1 kapha wimisai Kuilong area ga lungbam maileng wajiu kha lungbo khatdi sang chabin tadbo khatdi chali aliibo wajiuga ajiu misine chiujiu dinne. Thainai paliuniu PMGSY hangga changam kambambo npui phuitadbo hai, Tamei to Takou, Takou to Kuilong khatdi Kuilong to Lemta sgasu Katang to Magulong , Katang to Nheng via Ndai chiujiu phiutad khai mide.

Minister panai ronna mak jiu Chief Engineer's (RD&PR), Managing Director (BIPL) sigasu Additional Chief Engineer's concern joujiu tuhoi npui taliujiu bambo khatdi kapha taliujiu bambo dung sigasu taliu mawibo taliu tang makbo (Quality Maintain) phui tajutjiu tadkhai mide.

FIFA U17 Women's World Cup mathen ga Brazil niu India tu 5-0 ga ngamkhai mide.



Thaimien FIFA U17 Women's World Cup tadkiujiu bambo ga India leng thiujuiura tadngut sanra pajat chalak mide. Ndahnai Brazil nai mathen boga 5-0 ga India tu Brazil niu Ngamkhai mide. Tadmibo karaibo mathen gadi USA niu 8-0 ga India tu ngamkhai mibowe. India leng thiujui thainai mien niu FIFA U17 Women's World Cup ga jourai thiujui bambowe.

Mathiu khuga khengkhai lanne, chariudi tuhoi aliu Makuilongdi paper hai pawan gup ga patlulak bamdi khengkhai khelo. Aliudi kangam katang matanjuu bamme chiudi aliu khuga tuhoi ra maikhu ga kumjiu mania hai mali man makjiu kamwang tanglak jiu bamme. Naliu mathiu nkha pienniu khit-khit jiu wisan khang misune chiubo malum kadibo bamme.